

四庫全書

史部

欽定四庫全書

史部
金史卷十一
三

詳校官國子監祭酒臣覺羅吉善

內閣中書臣李彤覆勘

總校官舉人臣章維桓

校對官學錄臣常循

謄錄監生臣張彭齡

欽定四庫全書

金史卷十一

元中書

右丞相總

裁托克托等修

本紀第十一

章宗三

三年春正月己

亥朔日有食之辛丑宋夏遣使來賀癸

卯諭有司凡館

接伴并奉使者毋以語言相勝務存大

體奉使者亦必得其人乃可乙卯詔罷講議所丙辰如

城南春水丁巳併上京東京兩路提刑司為一提刑使
副兼安撫使副安撫專掌教習武事母今改其本俗已
未以都南行宮名建春甲子至自春水乙丑宋主以祖
母喪遣使告哀二月己巳朔辛建春宮辛巳諭宰臣曰
自今內外官有闕有才能可任者資歷未及亦具以聞
雖親故母有所避以武衛軍都指揮使烏凌阿天益等
為宋弔祭使甲申至自建春宮丙戌薩察內附辛卯平
章政事鈕祜祿額特埒薨三月戊戌以禮部尚書張曄

為御史大夫壬寅始榷醋甲寅如萬寧宮丁巳勅隨處盜賊毋以強為竊以多為少以有為無嘯聚三十人以上奏聞違者杖百丙寅高麗王王皓以弟暉權國事遣使奉表來告夏四月戊辰朔諭有司宰相遇雨可循殿廡出入丙申諭御史臺曰隨朝大小官雖有才能率多苟簡朕甚惡之其察舉以聞提刑司所察廉能汙濫官皆當殿奏餘事可轉以聞以侍御史孫倬為宣問高麗王王皓使五月庚子右宣徽使張汝方以漏泄廷議削

官兩階壬寅射柳擊毬縱百姓觀戊申以客省使伊喇
郁為夏國生日使甲子參知政事楊伯通表乞致仕不
許秋七月丙午幸香山巳酉如萬寧宮甲寅還宮八月
辛未獵于近郊癸酉獵于香山戊寅如萬寧宮庚辰以
護衛石和尚為押軍萬戶率親軍八百人武衛軍千六
百人戍西北路癸未還宮宋遣使來報謝九月丙申朔
天壽節宋夏遣使來賀以中都路都轉運使孫鐸等為
賀宋生日使乙巳獵于近郊庚戌參知政事楊伯通再

表乞致政不許戊午木波進馬冬十月庚午獵于近郊
癸未行樞密院言薩察等請開推場于色勒年從之丁
亥定官民存留見錢之數設回易務更立行用鈔法十
一月丁酉樞密使兼平章政事襄至自軍癸卯以為尚
書左丞相監修國史丁未以太常卿楊庭筠等為賀宋
正旦使戊申詔獎樞密副使瓜爾佳衡以下將士辛亥
定屬託法定軍前官吏選賞格以邊事定詔中外減死
罪徒以下釋之賜左丞相襄以下將士金幣有差甲寅

冬獵十二月甲子朔獵于酸棗林大風寒罷獵凍死者
五百餘人已已還都丙戌尚書右丞齊罷高麗權國事
王暉遣使奉表來告

四年春正月癸巳朔宋夏遣使來賀乙巳尚書左丞董
師中致仕辛酉監察御史姬端修以妄言下吏尚書左
丞相襄為司空職如故樞密副使承旨賈衡為平章政
事封英國公前知濟南府事張萬公復為平章政事封
壽國公楊伯通為尚書左丞簽樞密院事完顏匡為尚

書右丞二月乙丑如建春宮春水巳巳還宮庚午御宣
華門觀迎佛辛未如建春宮赦姬端修罪令居家俟命
司空襄言西南路招討使布薩揆治邊有功召赴闕以
知興中府事赫舍哩子仁代之壬申諭有司自三月一
日為始每旬三品至五品官各一人轉對六品亦以次
對臺諫勿與有應奏事與轉對官相見無面對者上章
亦聽乙亥還宮戊寅如建春宮庚辰上諭點檢司曰自
蒲河至長河及細河以東朕常所經行官為和買其地

令百姓畊之仍免其租稅甲申還宮乙酉以西南路招
討使布薩撥為參知政事起姬端修為太學博士如建
春宮戊子還宮三月丁酉同判大睦親府事宗浩為樞
密使封崇國公己亥如建春宮遣使冊王暉為高麗國
王戶部尚書孫鐸郎中李仲略國子祭酒趙忱始轉對
香閣丁未勅尚書官員必須改除者議之其月日淺者
毋數改易乙卯尚書省奏減親軍武衛軍額及太學女
直漢兒生員罷小學官及外路教授詔學校仍舊武衛

軍額再議餘報可司空襄右丞匡參知政事揆請罷諸
路提點刑獄從之戊午雨雹夏四月癸亥改提刑司為
按察使司戊辰如萬寧宮壬申左丞楊伯通致仕御史
大夫張暉以奏事不實追一官侍御史路鐸追兩官俱
罷之姬端修杖七十賸壬午英王從憲進封瀛王詔同
州許州節度使罷兼陝西河南副統軍五月壬辰朔以
早下詔責躬求真言避正殿減膳審理冤獄命奏事于
泰和殿戊戌命有司望祭嶽瀆禱雨己亥應奉翰林文

字陳載言四事其一邊民苦于寇掠其二農民困于軍
須其三審決冤滯一切從寬苟縱有罪其四行省官員
例獲厚賞而沿邊司縣曾不霑及此亦干和氣致旱災
之所由也上是之壬寅以兵部郎中完顏薩里罕為夏
國生日使戊申宰臣以京畿雨率百官請御正殿復常
膳不從尚書省奏上更定給發虎符制著于今庚戌諭
宰臣曰諸路早或闕執政今惟大興宛平兩縣不雨得
非其守令之過歟司空襄平章政事萬公參知政事揆

上表待罪上以罪已答之令各還職詔頒銅杖式壬子
祈雨于太廟乙卯更定軍功賞格戊午司空襄以下再
請御正殿復常膳不從庚申平章政事瓜爾佳銜亮以
宿直將軍圖克坦仲華為橫賜夏國使六月丁卯雨司
空襄以下復請御正殿復常膳從之甲戌以雨足命有
司報謝太廟丁丑右補闕楊庭秀言自轉對官外復令
隨朝八品以上外路五品以上及出使外路有可言者
並許移檢院以聞則時政得失民間利病可周知矣從

之己卯以雨足報祭社稷辛巳遣官報祀嶽瀆癸未奉
職醜和尚進浮漏水稱影儀簡儀圖命有司依式造之
丁亥定宮中親戚非公事傳達語言轉遞諸物及書簡
出入者罪七月甲辰更定尚藥儀鸞局學者格辛亥勅
宣徽院官天壽節凡致仕宰執悉召與宴而辰以久雨
令大興府祈晴八月己巳獵于近郊壬申獵于香山甲
戌以皇嗣未立命有司祈于太廟丁丑獵于近郊庚辰
還宮九月庚寅朔天壽節宋高麗貢遣使來賀己亥如

薊州秋山己未以知東平府事布薩琦等為賀宋生日
使冬十月丙寅至自秋山壬午初定百官休假甲申初
置審官院乙酉勅京府州縣設普濟院每歲十月至明
年四月設粥以食貧民十一月丙申平章政事張萬公
表乞致政不許庚戌命有司祈雪甲寅定護衛改充奉
御格以知濟南府事范楫等為賀宋元旦使十二月己
未除授文宇初送審官院辛酉更定考試隨朝檢知法
條格右補闕楊庭秀請類集太祖太宗世宗三朝聖訓

以時觀覽從之仍詔增熙宗為四朝癸未更定科舉法
增設國史院女直漢人同修史各一人定親軍及承應
人退閑遷賞格是月淑妃李氏進封元妃

五年春正月戊子朔宋高麗夏遣使來賀乙未以尚書
省言會試取策論詞賦經義不得過六百人合格者不
及其數則闕之內申如春水庚子命左右司五日一轉
奏事辛丑諭點檢司車駕所至仍令百姓市易庚戌定
明安穆昆軍前怠慢罷世襲制二月辛未至自春水辛

已有司奏應奉翰林文字溫特赫天興與其兄直學士
恩齊同僚學士院定撰制誥文字合無迴避詔不須避
仍為定制閏月癸卯定進納粟補官之家存留弓箭制
丁未與宰臣論置相曰圖克坦鑑朕志先定賈鉉如何
皆曰知延安府事孫即康可平章政事萬公亦曰即康
及第先鉉一榜上曰安問榜次特以賈才可用耳尚書
省奏右補闕楊庭秀言乞令尚書省及第左右官一人
應入史事者編次日歷或一月或一季封送史院上是

其言仍令送著作局潤色付之三月庚申大睦親府進
重修玉牒平章政事張萬公乞致政不許壬戌命有司
禱雨癸亥雨戶部尚書張鐸大理卿完顏薩喇國子司
業蒙古仁本召對便殿丙寅如萬寧宮戊辰定妻亡服
內婚娶聽離制親王宰執百官再請上尊號不許庚午
以知大興府事卞為御史大夫丙子尚書省奏擬同知
尚州事富察錫津為濟南府判官上曰宰相豈可止循
人情當重惜名爵此人不堪朕常記之止與七品足矣

庚辰以上京留守圖克坦鑑為平章政事封濟國公辛巳定本國婚聘禮制改山東東路舊皇城明安名曰赫爾根阿林四月丙戌朔文武百官再請上尊號不許丙午尚書省進律義五月乙卯朔定明安穆昆闕毆殺人遇赦免死罷世襲制以雨足遣使報祭社稷丁巳定策論進士及承應人試弓箭格戊午勅來日重五拜天服公裳者拜禮仍舊諸便服者並用女直拜己未勅諸路按察司糾察親民官以大杖箠人者乙亥親王文武百

官六學各上表請上尊號不許庶辰地震詔定進納官
有犯決斷法六月乙巳遣有司祈晴望祭嶽瀆七月乙
卯朔以晴遣官望祭嶽鎮海瀆癸亥定居祖父母喪婚
娶聽離法初置富森羣牧辛未平章政事萬公特賜告
兩月甲戌獵于近郊八月壬辰幸香山乙未至自香山
丁未勅審官院奏事院官皆許升殿戊申更定鎮防軍
犯徒配役法九月甲寅朔天壽節宋高麗夏遣使來賀
戊午命樞密使宗浩禮部尚書賈鉉佩金符行省山東

等路括地已未尚書省奏西北路招討使通吉思忠言
各路邊堡牆隍西自塔木色東至呼爾根幾六百里向
以起築忽遽無女牆副堤近令修定計工七十五萬止
役戍軍未嘗動民今已畢功上賜詔獎諭修玉牒成定
皇族收養異姓男為子者徒三年姓同者減二等立嫡
違法者徒一年癸亥如薊州秋山冬十月庚寅至自秋
山庚子風霾宋遣使來告哀辛丑集百官于尚書省問
間者亢旱近則久陰豈政有錯謬而致然歟各以所見

對以禮部郎中劉公憲為高麗生日使丁未獵于近郊
以宿直將軍完顏觀音努為夏國生日使十一月癸丑
朔日有食之乙卯以國史院編修官呂卿雲為左補闕
兼應奉翰林文字審官院以資淺駁奏上諭之曰明昌
間卿雲嘗上書言宮掖事辭甚切直皆他人不能言者
卿雲蓋不知也臣下言事不令外人知乃是謹密正當
顯用卿宜悉之以工部尚書烏庫哩誼等為宋弔祭使
初定品官過闕則下制已已宋復遣使來告哀辛未以

殿前右副點檢赫舍哩忠定為賀宋正旦使十二月癸未朔詔改明年為泰和元年以河南路統軍使充等為宋弔祭使乙未定管軍官受所部財物輒放離役及令人代役法辛丑詔宮籍監戶百姓自願以女為婚者聽癸卯定造作不如法三年內有損壞者罪有差

泰和元年正月壬子朔宋高麗復遣使來賀壬戌宋遣使獻先帝遺留物已巳以太府監孫復言方今在仕者三萬七千餘員而闕廕補叙居三之二諸司待闕動至

累年蓋以稍廢猥多流品混淆本末相舛至於進納之人既無勞績又非科第而亦廢及子孫無所分別欲流之清必澄其源乃更定廢叙法而頒行之尚書省奏令杖式輕細民不知畏請用大杖詔不許過五分庚午如長春宮春水辛未上以方春禁殺含胎兔犯者罪之告者賞之甲戌初命文武官官職俱至三品者許贈其祖二月壬辰去造土茶律丁未至自春水三月乙丑夏國遣使來謝壬申辛天長觀癸酉如萬寧宮乙亥宋遣使

來報謝丁丑更定鎮防千戶穆昆放老八除格辛巳勅
官司私文字避始祖以下廟諱小字犯者論如律夏四
月甲辰詔諭契丹人戶累經簽軍立功者官賞恩例與
女真人同仍許養馬為吏五月甲寅擊毬于臨武殿令
都民縱觀丙辰樞密使宗浩罷壬戌辛玉泉山戊寅削
尊長有罪卑幼追捕律以直東上閤門劉頤為橫賜高
麗使六月己卯朔辛香山乙酉平章政事張萬公乞致
仕不許辛卯祈雨于北郊己亥用尚書省言申明舊制

明安穆昆戶每田四十畝樹桑一畝毀樹木者有禁鬻
地土者有刑其田多汙萊人戶闕乏并坐所臨長吏按
察司以時勸督有故慢者量決罰之仍減牛頭稅三之
一勅尚書省舉行風俗奢侈之禁己巳初許諸科徵鋪
馬黃河夫軍須等錢折納銀一半願納錢鈔者聽丁未
詔有司修蓮花漏七月辛酉禁放良人不得應諸科舉
子孫不在禁限甲子諭刑部官凡上書人言及宰相者
不得申省乙丑更定右選汪縣令丞簿格己巳初禁廟

諱同音字八月庚辰初命戶絕者田宅以二分之一付
其女及女孫戊子特改授司空襄河間府路算卓和世
襲明安乙未至自萬寧宮丙申宋遣使來報謝壬寅制
明安穆昆並隸按察司監察御史止按部糾察有罪則
併坐監臨之官詔推排西北京遼東三路人戶物力九
月戊申朔天壽節宋高麗夏遣使來賀更定贍學養仕
法生員給民佃官田人六十畝歲支粟三十石國子生
人百八畝歲給以所入官掌其數以右宣徽使圖克坦

懷忠等為賀宋生日使甲寅如秋山丙子至自秋山冬
十月乙酉裕享于太廟戊子平章政事張萬公乞致仕
不許壬辰御史臺奏在制按察司官比任終遣官方覈
然後尚書省命官覆察之今監察御史添設員多宜分
路巡行每路女直漢人各一人同往從之仍勅分四路
丙申御史大夫卞乞致仕不許戊戌以武衛軍都指揮
使司判官納哈塔鉉為高麗生日使壬寅勅有司購遺
書宜償償以廣搜訪藏書之家有珍惜不願送官者官

為勝寫畢復還之仍量給其直之半甲辰以刑部員外
郎完顏綱為夏國生日使十一月庚戌司空襄以下文
武百官復請上尊號不許辛亥勅尚書凡役衆勞民之
事勿輕行之丁巳諭工部曰比聞懷州有橙結實官吏
檢視已嘗擾民今復進柑得無重擾民乎其誠所司遇
有則進無則已庚申以殿前右衛將軍赫舍哩齊錦等
為賀宋正旦使十二月辛巳朔改原廟春秋祭祀稱朝
獻司空襄以下復請上尊號詔不允仍斷來章丁酉司

空裏等進新定律令勅條格式五十二卷辛丑詔頒行之壬寅獵于近郊乙巳初定燕能官升注格

二年春正月丁未朔宋高麗夏遣使來賀乙卯始朝獻于衍慶宮庚申幸芳苑觀燈癸酉歸德軍節度副使韓琛以強市民布帛削一官罷之甲戌如建春宮二月戊戌初置內侍寄祿官乙巳遷宮三月甲寅初置宮苑司都同監各一人甲子蔡王從奐母充等太師辛詔有司定喪禮葬儀事載從奐傳四月庚辰幸昇國長公主第

問疾已亥定遷三品官格復撲買河漵法辛丑諭御史
臺諸訴事于臺當以實上聞不得輒稱察知癸卯如萬
寧宮命有司祈雨五月甲辰朔日有食之戊申如泰和
宮辛亥初薦新于太廟壬戌諭有司曰金井已納不過
二三日留朕之所止一涼履足矣若加修治徒費人力
其藩籬不急之處用圍幕可也甲子更泰和宮曰慶寧
長樂川曰雲龍已巳勅御史臺京師拜廟及巡幸所過
州縣止令灑掃不許以黃土覆道違者糾之六月辛卯

諭尚書省諸路禾稼及雨多寡令州郡以聞七月辛亥
有司奏還宮日請用黃麾杖不許乙卯朝獻于衍慶宮
八月丙申鳳凰見于磁州武安縣鼓山石聖臺丁酉還
宮皇子生九月壬寅朔天壽節宋高麗夏遣使來賀甲
寅以拱衛直都指揮使完顏瑋等為賀宋生日使且戒
之曰兩國和好久矣不宜爭細故傷大體癸亥以皇子
生親謝南北郊庚午封皇子為葛王冬十月戊寅報謝
于太廟及山陵甲申以鳳凰見詔中外丙戌獵于近郊

壬辰遣尚輦局副使李仲元為高麗國生日使以宿直
將軍赫舍哩毅為夏國生日使瀛王府司馬通吉溫為
橫賜使十一月甲辰更定德運為土臘用辰以西京留
守宗浩為樞密院戊申以更定德運詔中外庚申初命
外官三品到任進表稱謝甲子章王虛觀遣使報謝於
太清宮十二月癸酉以皇子晬日放僧道戒牒三千以
武安軍節度使圖克坦公弼等為賀宋正旦使戊寅冬
臘庚辰報謝于高樛丁酉還都閏月庚戌司空襄慶癸

且命監察御史非特旨不許舉官辛酉遣使報謝于北
嶽定人戶物力隨時推收法丁卯遣使報謝于長白山

冬無雪

三年春正月辛未朔宋高麗夏遣使來賀癸酉遣官祈
雪于北嶽丁酉朔獻于衍慶宮己卯以樞密使宋浩為
尚書右丞相右丞完顏匡為左丞參知政事布薩揆為
右丞御史中丞孫即康刑部尚書賈鉉並為參知政事
庚辰如建春宮二月癸丑還宮甲子定諸職官省親拜

墓給假之例三月壬申平章政事張萬公致仕庚辰如
萬寧宮丁亥定從人銅牌賣毀罪賞制庚寅定職官應
遭三品格刺史以上及朝資歷在刺史以上身故者每
半年一次敷奏甲午如玉泉山丙申以殿前都點檢布
薩端為御史大夫四月乙巳禘于太廟勅點檢司致仕
官入宮年高艱于步履者並聽策杖仍令舍人護衛扶
之丁巳勅有司祈雨仍頒土龍法己未命吏部侍郎李
炳國子司業蒙古仁本知登聞檢院喬宇等再詳定儀

禮庚申諭省司官中所用物如民間難得勿強市之癸亥尚書省奏遣官分路覆實御史所察事五月壬申以重五拜天射柳上三發三中四品以上官侍晏魚藻殿以天氣方暑命兵士甲者釋之丙戌以定律令正土德鳳凰來皇嗣建大赦辛卯皇子葛王薨壬辰定擅增減宮門鎖鑰罪丙申作太極宮六月己亥太白晝見壬寅詔選聰明方正之士為修起居注又詰點檢司諸親軍所設教授及授業人若干其為教何法通大義者幾人

各具以聞戊申定職官追贈法惟嘗犯贓罪者不在追贈之列壬戌遣官行視中都田禾水澤分數七月壬申朝獻于衍慶宮乙亥定大臣薨百官奉慰禮與辰獵于近郊丁亥上諭宰臣凡奏事朕欲徐思或如已者若除授事可俟三五日再奏餘並二十日奏之八月丙辰還宮庚申命編修官左容充宮教賜銀幣九月丙寅朔天壽節宋高麗夏遣使來賀壬申以刑部尚書承暉等為賀宋生日使戊子以萬寧宮提舉司隸工部壬辰詔定

千戶穆昆受隨處捕盜官公移盜急不即以衆應之者
罪有差召右丞相宗浩還朝冬十月戊戌日將暮赤如
緒己亥大風甲辰申酉間天大赤夜將旦亦如之壬子
右丞布薩揆至自北邊丙辰召至香閣慰勞之以尚食
局使師孝為高麗生日使庚申尚書左丞完顏匡等進
世宗實錄上降座立受之壬戌以薊州刺史完顏太平
為夏國生日使奉御完顏阿魯岱以使宋還言宋權臣
韓侂冑市馬厲兵將謀北侵上怒以為生事笞之五十

出為彰德府判官及淮平臨乃擢為安國軍節度副使
丁卯諭尚書省士庶陳言皆從所司以聞自今可悉令
詣闕量與食直仍給官舍居之其言切直及繫利害重
者並三日內奏聞十一月辛未以簽樞密院事通吉思
忠等為賀宋正旦使丁丑冬獵以獲兔薦山陵甲午詔
監察等察事可二年一出十二月庚子諭宰臣曰賀正
宋使且至可令監察隨之以為常壬寅還都已酉賜天
長觀額為太極宮辛亥詔諸親王公主每歲寒食十月

朔聽朝謁興裕二陵忌辰亦如之癸丑詔遣監察御史
分按諸路所遣者女直人即以漢人朝臣偕所遣者漢
人即以女直朝臣偕戊午勅行宮名曰光春其朝殿曰
蘭皋寢殿曰輝寧

金史卷十一

欽定四庫全書

金史卷十二

元中書右丞相總裁托克托等修

本紀第十二

章宗四

四年春正月乙丑朔宋高麗夏遣使來賀丁卯諭外方
使人不得佩刀入宮庚午幸豫王永成第視疾辛未如
光春宮春水壬申陰霧木冰丁丑行尚書省奏宋賀正

使還至慶都卒詔遣防禦使努色爾往祭致賻絹布各二百二十疋仍命送伴使張雲護喪以歸豫王永成薨卒卯高麗國王王暉沒嗣子謨遣使來告哀二月乙未朔還宮丁酉以山東河北旱詔祈雨東北二嶽己亥命購豫王永成遺文庚戌始祭三皇五帝四王癸丑詔刺史州郡無宣聖廟學者並增修之三月丁卯日昏無光大風毀宣陽門鵠尾癸酉命大興府祈雨戊寅幸太極宮詔定前代帝王合致祭者尚書省奏三皇五帝四王

已行三年一祭之禮若夏太康殷太甲太戊武丁周成
王康王宣王漢高祖文景武宣光武明帝章帝唐高祖
文皇一十七君致祭為宜從之乙酉祈雨于北郊丁亥
如萬寧宮壬辰祈雨于社稷遼陽府判官錫默瑠嘉以
上書論列朝臣削官一階罷之夏四月丙申詔定縣令
以下考課法己亥祈雨于太廟庚子增定關防姦細格
丙午定衣服制以祈雨望祀嶽鎮海瀆于北郊癸丑祈
雨于社稷甲寅以久旱下詔責躬求直言避正殿減膳

撤樂省御廐馬免旱菑州縣徭役及今年夏稅遣使審
繫囚理冤獄乙卯宰臣上表待罪詔答曰朕德有愆上
天示異卿等各趨乃職思副朕懷戊午以西上閤門使
張偁等為故高麗國王王暉勅祭使東上閤門使石慤
等為高麗國王王諤慰問起復橫賜使庚申祈雨于太
廟壬戌萬寧宮端門災五月乙丑祈雨于北郊有司請
霄詔三禱獄瀆社稷宗廟不雨乃行之癸酉平章政事
圖克坦鎰尚書右丞完顏匡罷甲戌乙亥雨百官表奏

御正殿復常儀乙酉謝雨于宗廟丁亥報祀社稷太隨
朝冗官定省令史闌決公務詭稱已稟擅退六部大理
寺法狀及妄有所更易者罪辛卯報謝獄鎮海瀆六月
壬辰朔罷兼官俸給壬寅復行吏目移轉法乙巳始祭
中霤戊申罷惠川高三州秀巖濠陽徽川咸寧全安利
民六縣及北京宮苑使諸羣牧提舉居庸紫荆通會三
關使西北路鎮防十三千戶諸路醫學博士壬子司天
臺長行張翼進天象傳秋七月丁卯定申報盜賊制戊

辰朝獻于衍慶宮庚午幸望京甸壬申如萬寧宮甲戌
罷限錢法甲申改葬錫王永中于威州八月大理丞姬
端修司直溫都諳達論奏知大興府事赫舍哩執中坐
所言不當各削一官罷職丁酉以尚書右丞相崇浩為
左丞相右丞布薩揆為平章政事參知政事孫即康為
尚書右丞御史大夫布薩端為左丞吏部尚書通吉思
忠為參知政事庚子詔完顏綱喬宇宋元吉等編類陳
言文字其言涉宮廷若大臣省臺六部各以類從凡二

千卷辛丑以西京留守崇肅為御史大夫癸卯更定閣
門祇候出職格先是以天旱詔求直言至是尚書省奏
河南府盧顯達汝州王大材所陳言涉不遜請以情理
切害論其罪從之仍徧論中外命諸路學校生徒少者罷
教授止以本州府文資官提控之丁未以安州軍事判
官劉常言諸按察司體訪不實輒加糾劾者從故出入
人罪論仍勒停若事涉私曲各從本法辛亥還宮乙卯
以知真定府事完顏昌等為賀宋生日使丁巳幸太

極宮弛圍場遠地禁縱民耕捕樵採減教坊長行五十人渤海教坊長行三十人文繡署女工五十人出宮女百六十人九月庚申朔天壽節宋高麗夏遣使來賀丙寅如薊州秋山壬申定屯田戶自種及租佃法冬十月甲午定私醵法丙申詔親軍三十五以下令習孝經論語癸卯至自秋山甲寅以提點尚衣局完顏燮為夏國生日使十一月丁卯以殿前右副都點檢烏凌阿毅等為賀宋正旦使癸酉木冰凡三日丁丑定收補承應人格

十二月己丑朔新平等縣好蚌蟲生己亥左丞相崇浩等請上尊號不許辛丑勅陝西河南饑民所鬻男女官為贖之乙卯百官再表乞受尊號不許

五年春正月己未朔大雪宋高麗夏遣使來賀庚申謁衍慶宮乙丑幸太極宮丁卯如光春宮春水壬申朝獻于衍慶宮乙亥詔有司自太和三年郡縣三經行幸民嘗供億者賜今年租稅之半丁丑次霸州調山東河北軍夫改治漕渠二月己丑朔論按察司近制以鎮靜而

知大體為稱職苛細而闇於大體為不稱由是各路按察以因循為事莫思舉刺郡縣以貪黷相尚莫能畏戢自今若糾察得實民無冤滯能使一路鎮靜者為稱職其或煩紊使民伸愬者是為曠廢癸巳定鞠勘之官受飲宴者罪己亥如建春宮甲寅制盜用及偽造都門契者罪視宮城門減一等三月庚申還宮癸亥更定兩稅輸限乙丑宋兵入秦川界庚午親王百官請上尊號不許甲戌諭有司進士名有犯孔子諱者避之仍著為

令命給米諸寺自十月十五日為始至次年正月十五日作糜以食貧民戊寅罷獄空錢辛巳宋兵入鞏州來遠鎮唐州得宋謀者言韓侂冑屯兵鄂岳將謀北侵四月戊子朔如萬寧宮癸巳命樞密院移文宋人依誓約撤新兵毋縱入境壬子定隨路轉運司及府官每季檢視庫物法五月甲子以平章政事布薩揆為河南宣撫使籍諸道兵以備宋癸酉詔定遼東邑社人數戊寅更定檢知法勒留格已卯如慶寧宮制司屬丞凡遭父母喪止

給卒哭假為永制甲申宋人入漣水縣六月戊子復漣
水縣丁酉制定本朝婚禮更定鬻米麪入外界法己酉
制鎮防軍盜亡致邊事失錯陷敗戶口者罪甲寅詔拜
禮不依本朝者罰呂諸大臣問備宋之策皆以設備養
惡為言上以南北和好四十餘載民不知兵不忍先發七
月戊辰如錦屏山壬申朝獻于衍慶宮乙亥宣撫使揆
奏定姦細罪賞法丙子定圍塲誤射中人罪壬午詔諸
縣盜賊多所選注巡尉八月辛卯詔罷宣撫司時宋

殿帥郭倪濠州守將田俊邁誘虹縣民蘇貴等為河間南將臣亦屢縱謀往往利俊邁之賂反為遊說皆言宋之增戍本虞他盜及聞行臺之建亦畏讐言不敢去備且兵皆白丁自裹糧糲窮蹙饑疫死者十二三由是中外信之宣撫司以宋三省樞密院及盱眙軍牒來上又皆鐫點邊臣為辭宣撫使揆因請罷司從之揆又奏罷臨洮德順秦鞏新置弓箭手閏月乙卯朔典衛司丙子還宮九月甲申朔天壽節宋高麗夏遣使來賀戊子西北

方黑雲間有赤氣如火色次及西南正南東南方皆赤有白氣貫其中至中夜赤氣滿天四更乃散以河南路統軍使赫舍哩子仁等為賀宋生日使戊戌宋兵三百攻比陽寺莊副巡檢阿里哈肆嘉努死之甲辰宋人焚黃澗攜巡檢高顥冬十月庚申以刑部員外郎李元忠為高麗生日使丁丑宋人襲比陽唐州軍事判官索多死之十一月乙酉宋人入內鄉攻洛南之固縣商州司獄壽祖追至丹河擊敗之己丑以太常卿趙之傑等為

賀宋正旦使癸巳山東闕食賜錢三萬貫以賑之乙未
初定武舉格丁酉詔山東陝西帥臣訓練士卒以備非
常仍以銀十五萬兩分給邊帥募民偵伺復遣武衛軍
副都指揮使完顏太平殿前右衛副將軍富察阿里赴
邊伺其入伏兵掩之戊戌大雪免朝參己亥更定宮中
局署承應收補格宋吳曦擁衆興元欲窺闕隴皇甫斌
益募兵擾淮北所掠即以與之使自為戰

六年春正月癸未朔宋高麗夏遣使來賀丁亥宋使陳

克俊等朝辭遣御史大夫孟鑄就館諭克俊等曰大定
初世宗皇帝許宋世為姪國朕遵守遺法和好至今豈
意爾國屢有盜賊犯我邊境以此遣大臣宣撫河南軍
民及得爾國有司公移稱已罷黜邊臣抽去兵卒朕方
以天下為度不介小嫌遂罷宣撫司未幾盜賊甚于前
日比來羣臣屢以爾國渝盟為言朕惟和好歲久委曲
涵容恐姪宋皇帝或未詳知若依前不息臣下或復有
云朕雖兼愛生靈事亦宜能終已卿等歸國當以朕意

具言之汝主辛卯朝享于衍慶宮丙申宋興元守將吳
曦遣兵圍穆舒隆堡部將布希長安擊走之斬其將辛
且更定保伍法癸卯始以沁河縣官兼管句漕河事州
府府官兼提控丁未如春水庚戌宋人入薩滿谷陝西
統軍判官完顏果囉翠州兵馬鈐轄完顏齊勤約宋西
和州守將會境上俄伏發為所襲木波部長趙彥雄等
七人死焉果囉馬陷淖中中流矢齊勤僅以身免二月
甲戌御史中丞孟鑄言提刑改為按察司又差官覆察

權削而望輕非便參知政事賈鉉曰按察司既差監察
體訪復遣官覆察之誠為繁冗請自今差監察時即遣
官與俱更不覆察從之三月甲午尚書省奏商州刺史
烏庫哩揚珠請賻押軍官與南兵戰沒者又奏遷右振
肅富察烏錦官皆從之明昌初烏錦嘗為奉御出使山
東至河間以百姓饑輒移提刑司開倉賑之還具以聞
上甚悅太傅圖克坦克寧言陛下始親大政不宜假近
侍人權乞正專擅之罪詔杖之二十克寧又以為言乃

罷之後上思之由泰州都軍召為振肅已亥如萬寧宮
甲辰勅尚書省祖父母父毋無人侍養而子孫遠遊至
經歲者甚傷風化雖舊有徒二年之罪似涉太輕其考
前律再議以聞己酉宋人攻靈壁南京按察使行部至
縣匿民舍得免四月丙辰宋人圍壽春壽春告急于毫
同知防禦使賢聖努將部騎六百赴之乃退癸亥尚書
省奏河南統軍司言統軍使赫舍哩子仁等遣嚴整閭
忠周秀輩入襄陽覘敵陰事還言皇甫斌遣兵四萬覘

取鄧以我叛人田元為鄉導三萬人規取唐以張貞張勝為鄉導俱授統領官故不敢無備乃聚鄭汝陽翟之兵于昌武以南京副留守兼兵馬副都總管赫舍哩毅統之聚亳陳襄邑兵于歸德以河南路副統軍圖克坦鐸統之而自以所部兵駐汴及擬山東東西路軍七千付統軍赫舍哩執中駐大名河北東西路軍萬七千屯河南皆給以馬有老弱者易其人皆從之甲子宋人攻天水界乙丑入東柯谷部將劉鐸戰敗之丙寅詔平章

政事布薩揆領行省于汴許以便宜從事升諸道統軍
司為兵馬都統府以山東東西路統軍使赫舍哩執中
為山東西路兵馬都統使定海軍節度使副都統軍使
完顏薩喇副之陝西統軍使充為陝西五路兵馬都統
使通遠軍節度使和碩知臨洮府事舒穆魯仲溫副之
河南皆聽揆節制如故盡徵諸道籍兵卒未宋吳曦攻
來遠鎮之蘭家鎮丙子詔諸職官納馬各有數丁丑宋
人入新息內鄉又入泗州戊寅入褒信己卯入虹縣庚

辰入穎上五月壬午宋李爽圍壽州田俊邁入蘄州秦
詵攻蔡州防禦使完顏佛珠敗之又入金城海口殺長
山尉執二巡檢以去甲申太白晝見丙戌以宋畔盟出
師告于天地太廟社稷丁亥親告于衍慶宮戊子平章
政事布薩揆兼左副元帥陝西兵馬都統使克為元帥
右監軍知真定府事烏庫哩誼為元帥左都監辛卯以
征南詔中外賜唐州刺史烏克遜鄂屯總押鄧州兵馬
事完顏江山爵各二級蔡州防禦使完顏佛珠爵一級

餘賞賚有差又以非嚴整上變必為所誤授整嵩州巡檢使賜爵八級錢二百萬上以宋兵方熾東北新調之兵未集河南之衆不足支命河北大名北京天山之兵萬五千屯真定河間清獻等以為應壬辰諭尚書省今國家多故凡言軍國利害五品以上官以次奏陳朕將親問之六品以下則具帖子以進癸巳山東路災赦死罪以下以樞密副使完顏匡為右副元帥宋田俊邁攻宿州安國軍節度副使納喇邦烈等出兵擊之邦烈中

流矢宋郭俾李汝翼以衆繼之遂圍宿州壬寅納喇邦烈等擊敗之俊邁退保于蘄癸卯執俊邁于蘄甲辰皇甫斌攻唐州刺史烏克遜鄂屯拒之行省遣泌陽副巡檢納哈塔軍勝來援遂敗之庚戌太白經天六月辛亥朔左丞布薩端以母憂罷平章政事揆報蘄之捷并送所護宋將田俊邁至闕上降詔褒諭賜赫舍哩貞納喇邦烈薩克達等爵賞有差宋將李爽以兵圍壽州刺史圖克坦義拒守踰月不能下壬子河南統軍判官竒珠

及邁格等以兵來援義出兵應之爽敗同知軍州事布
埒軍中流矢死乙卯初置急遞鋪腰鈴轉遞日行三百
里非軍期河防不許起馬定軍前差發受贓罪除飛蝗
入境雖不食禾稼亦坐罪法丁巳詔彰德府宋韓侂冑
祖琦墳毋得損壞仍禁樵採庚申右翼都統完顏薩布
敗宋曹統制于溱水辛酉詔有司有宋宗族所居各具
以聞長官常加提控壬戌平章政事揆報壽州捷戊辰
詔升壽州為防禦免今年租稅諸科名錢釋死罪以下

以圖克坦義為防禦使贈布塔庫昭勇大將軍賜錢三百貫官其子圖喇擢奇珠同知昌武軍節度使事邁格河南路統軍判官都統薩布副統布希萬努各進爵一級賜金幣各有差辛未木星晝見至七月戊申經天乙亥宋吳曦攻鹽川戍將完顏王喜敗之秋七月癸未宋商榮復攻東海縣令完顏綱森復敗之還中伏矢死贈海州刺史以銀五百兩絹百匹給其家仍官一子甲申朝獻于衍慶宮丁亥勅翰林直學士陳大任以本職專修

遼史甲午宋統制戚春以舟師攻邳州刺史完顏從正
敗之春赴水死斬其副夏統制吳曦兵五萬入秦州陝
西路都統副使承裕等敗之丙申夏國王李純佑廢姪安
全立遣使奉表來告詔禁賣馬入外境但至界欲賣
而為所捕即論死八月庚戌山東帥來報邳州之捷辛
亥木星晨見乙卯以羌酋青伊克為疊州副都總管已
未太白晝見丙寅左丞布薩端起復前職詔設平南諸
將軍辛未宋程松襲取方山原富察貞破走之壬申

太白晝見經天甲戌至自萬寧宮乙亥赦唐鄧穎蔡宿
泗六州免來年租稅三分之一九月己卯朔天壽節高
麗遣使來賀辛巳元帥右都監富察貞取和尚原臨洮
番部遵寧獻芻粟戰馬以助軍乙酉將五鼓北方有赤
白氣數道起于王良之下行至北斗開陽搖光之東丙
戌幸香山庚寅勅行尚書省有方畧出衆武藝絕倫才
幹辦事工巧過人者其招選之甲午參知政事賈鉉乞
致政不許戊戌尚書左丞布薩端行省于汴己亥尚書

戶部尚書梁鏜行六部尚書事于山東辛丑遣尚書左
司郎中溫特赫思敬冊李安全為夏國王甲辰宋吳曦
將馮興揚雄李珪等入秦州陝西都統副使承裕等擊
破之斬楊雄李珪冬十月戊申朔平章政事布薩揆督
諸道兵伐宋庚戌揆以行省兵三萬出潁壽河南路統
軍使赫舍哩子仁以兵三萬出渦口元帥匡以兵二萬
五千出唐鄧左監軍赫舍哩執中以山東兵二萬出清
口右監軍充以關中兵一萬出陳倉右都監富察貞以

岐隴兵一萬出成紀蜀漢路安撫使完顏綱以漢番步
騎一萬出臨潭臨洮路兵馬都總管舒穆魯仲溫以隴
右部騎五千出鹽川隴州防禦使完顏璘以本部兵五
千出來遠甲子獵近郊十一月戊寅朔詔定諸州府物
力差役式壬午完顏匡攻下棗陽乙酉詔屯田軍戶與
所居民為婚姻者聽丁亥布薩揆克安豐軍取霍邱縣
赫舍哩執中克淮陰遂圍楚州己丑尚書省奏減朝官
及承應人月俸折支錢庚寅完顏匡克光化軍及神馬

坡壬辰布薩揆次廬江宋督視江淮兵馬事邱密遣劉祐來乞和赫舍哩子仁克定遠縣乙未完顏匡取隨州丙申赫舍哩子仁克滁州戊辰詔諸路行用小鈔完顏匡圍德安別以兵徇下安陸應城雲夢孝感漢川荊山等縣庚子日斜有流星二光芒如炬幾及一丈起東北沒東南初定茶禁完顏綱圍祐州降之宋邱密遣林拱持書乞和辛丑完顏匡攻襄陽破其外城布薩揆克含山富察貞克天水赫舍哩子仁徇下來安全椒二縣壬

寅完顏綱徇下荔川間川等城癸卯邱室復遣宋顯等
以書幣乞和乙巳完顏綱克宕昌丙午富察貞克西和
州十二月丁未朔完顏匡克宜城布薩揆攻和州薩克
達中流矢死壬子完顏綱次大潭縣降之富察貞克成
州癸丑宋太尉昭信軍節度使四川宣撫副使吳曦納
款于完顏綱戊午右監軍充攻下大散關己未赫舍哩
子仁克真州邱室復遣陳璧等奉書乞和辛酉右監軍
充遣烏雅綽哈以兵趣鳳州城潰入焉完顏綱遣京兆

錄事張仔會吳曦于興州之置口曦具言所以歸朝之意仔請以告身為報盡出以付之仍獻階州乙丑初設都提控急遞鋪官平章政事布薩揆班師完顏綱以朝命假太倉使馬良顯齎詔書金印立吳曦為蜀王戊辰富察貞以西和天水等捷來報完顏匡進所掠女子百人已已曦遣其果州團練使郭澄提舉仙人關使任辛奉表及蜀地圖志吳氏譜牒來上壬申詔完顏匡權尚書右丞行省事右副元帥如故以赫舍哩執中縱下擄

掠遣近臣杖其經歷阿爾巴斯等仍詔放還所掠

七年春正月丁丑朔高麗夏遣使來賀完顏匡攻襄陽
戊寅勅宰臣舉材幹官同議南征事辛巳詔御史大夫
崇肅同知大睦親府事圖克坦懷忠吏部尚書范楫戶
部尚書高汝礪禮部尚書張行簡知大興府事溫特赫
思齊等十有四人同對于慶和殿壬午詔百官及前十
四人同對于廣仁殿甲申朝獻于衍慶宮乙酉贈故壽
州死節軍士魏全宣武將軍蒙城令封其妻鄉君子埃

年至十五收充八貫石正班局分承應仍賜錢百萬初
李爽圍壽州刺史義募人往斫敵營全在選中而為敵
所執敵令罵義則免全陽許及至城下反罵敵遂殺之
至死罵不絕聲故有是恩戊子召完顏綱赴闕庚申布
薩揆還駐下蔡而病丙申以左丞相崇浩兼都元帥行
省于南京以代揆己亥有司奏更定茶禁辛丑完顏匡
取穀城二月丙辰赦鳳成西和階山五州丁巳詔追復
永中永蹈王爵宋知樞密院張巖遣方信孺以書詣平

章政事揆左丞端乞和已未獵于近郊完顏匡克荆門
軍癸亥如建春宮吳曦遣使奉三表來謝封爵陳誓言
賀全蜀內附丙寅還宮戊辰平章政事兼左副元帥布
薩揆薨于軍癸酉遣同知府事珠格高琪等冊吳曦為
蜀國王判平陽府事衛王永濟改武定軍節度使兼奉
聖州管內觀察使是月蜀國王吳曦為宋臣安丙所殺壬辰
初定蟲蝻生發地主及鄰主首不申之罪宋復攻破階州癸
巳復攻破西和州乙未宣撫副使完顏綱至鳳翔詔撤

五州之兵分保要害綱召諸軍還庚子以完顏匡為左副元帥壬寅如萬寧宮甲辰幸西園夏四月壬子遣宮籍副監楊序為橫賜高麗王使癸丑宋人攻破散關鞏州鈴轄烏雅受實死之丙辰以赫舍哩子仁為右副元帥戊辰詔元帥府分遣諸將遊奕淮南諸州癸酉復下散關五月己卯幸東園射柳己丑幸玉泉山丙申宋知樞密院事張巖復遣方信孺以書至都元帥府增歲幣乞和四州安撫使安丙遣西和州安撫使李孝義率步

騎三萬攻秦州圍皂角堡珠格高琪以兵赴之七戰而解其圍是月放宮女二十人六月乙巳朔詔朝官六品外官五品以上及親王舉通錢穀官一人不舉者罰舉不當者論如律己酉以山東盜制同黨能自殺捕出首官賞法戊午烏庫哩誼為元帥左監軍完顏薩喇為元帥左都監乙丑遣使捕蝗秋七月庚辰朝獻于衍慶宮壬午詔民間交易典質一貫以上並用交鈔毋用錢乙酉勅尚書省自今初受監察者令進利害帖子以待召

見甲午左副元帥匡至自許州乙未詔覈西夏人口盡
贖放還敢有藏匿者以違制論八月戊申宋張巖復遣
方信孺齎其主誓書藁來乞和庚戌割汝州襄城縣于
許州戊辰至自萬寧宮九月甲戌朔天壽節高麗夏遣
使來賀左丞相兼都元帥崇浩薨于軍甲申定西北京
遼東鹽司判官諸場管勾增虧升降格以尚書左丞布
薩端為平章政事封申國公左副元帥完顏匡為平章
政事兼左副元帥封定國公丙戌獵于近郊壬辰還宮

戊戌更定受制忘誤及誤寫制書事重加等罪壬寅勅女直人不得改為漢姓及學南人裝束冬十月甲辰詔應廕之家旁正廕足其正廕者未出官而亡許補廕一人辛亥以武庫令珠嘉佛新為高麗生日使丙辰獵于近郊己巳詔定隨軍遷賞格辛未陝西宣撫使圖克坦鎰分遣副統巴噶罕攻下蘇嶺關是月定南征將士功賞格十一月癸酉詔新定學令內削去薛居正五代史用歐陽修所撰是日都統雅爾拔鵲嶺關新道口副

統把噶罕取小湖關教倉至營口鎮遂取其城丙子宋
韓侂冑遣左司郎中王柝以書來乞和請稱伯增歲幣
犒軍錢誅蘇師旦函首以獻丙戌上聞陝州防禦使赫
舍哩博索禁民輶命尚書省罪之壬辰宋參知政事錢
象祖以誅韓侂冑移書行省甲午獵于近郊戊戌參知
政事賈鉉罷詔完顏匡檄宋函侂冑首以贖淮南故地
十二月壬寅朔遼史成丙午以符寶郎烏庫哩福齡為
夏國生日使丙午詔策論進士免試弓箭擊毬庚申以

尚書右丞孫即康為左丞參知政事通吉思忠為右丞
中都路都運使孫鐸為參知政事

八年春正月辛未朔高麗夏來賀壬申朝謁于衍慶宮
癸酉毀大鈔行小鈔以元帥左都監完顏薩喇為參
知政事乙亥宋安丙遣兵襲鶻嶺關副統把噶罕完顏
果囉擊走之斬其將景統領丙子左司郎中劉昂通州
刺史史肅監察御史王宇吏部主事曹元吏部員外郎
圖克坦永康太倉使馬良顯順州刺史唐古卓克索巴

坐于蒲陰令太中私議朝政皆杖之癸未如春水丙戌
如廣春宮二月乙巳宋參知政事錢象祖遣王柎來以
書上行省復請川陝關隘甲寅如建春宮庚申諭有司
曰方農作時雖在禁地亦令耕種己巳還宮三月丁亥
幸瀛王第視疾庚寅以與宋和諭尚書省壬辰宰臣上
表謝罪甲午瀛王從憲薨乙未上親臨祭夏四月癸卯
日暈三重皆內黃外赤戊申禘于太廟庚戌如萬寧宮
甲寅以北邊無事勅尚書省命東北路招討司還治泰

州就兼節度使其副招討仍置于邊詔諭有司以苗稼
方興宜速遣官分道巡行農事以備蟲蝻詔更定明安
穆昆承襲程試格宋錢象祖復遣王耒以書上行省庚
申詔諸路按察司歲賜公用錢閏月辛未諭尚書省曰翰
林侍講學士富察烏延言使宋官當選人其言甚當
彼通謝使雖未到闕其報聘人當先議擇自此更始凡
有禮數皆在奉使今既行之遂為永例不可不慎也甲
戌制諸州府司縣造作不得役諸色人匠違者準私役

之律計傭以受所監臨財物論甲申定承應人收補年
甲格甲午雨雹定保甲軍殺獲南軍官賞乙未宋獻韓
侂冑等首于元帥府五月丁未御應天門備黃麾立仗
親王文武合班起居中路兵馬提控平南撫軍上將軍
赫舍哩貞以宋賊臣韓侂冑蘇師旦首獻并奉元帥府
露布以聞懸其首并畫像于市以露布頒中外丙辰平
章政事匡至自軍己未更元帥府為樞密院癸亥詔移
天壽節于十月十五日丁卯遣使分路捕蝗六月癸酉

宋通謝使朝議大夫試禮部尚書許奕福州觀察使右
武衛上將軍吳衡等奉其主書入見甲戌謁謝于衍慶
宮癸未以許宋平詔中外免河南山東陝西等六路今
年夏稅河東河北大名等五路半之丁亥以元帥左都
監烏庫哩誼為御史大夫戊子飛蝗入京畿乙未定服
飾明金象金制丁酉以副都檢點完顏侃為宋諭成使
禮部侍郎喬宇副之秋七月戊戌朔太白晝見庚子詔
更定蝗蟲生發坐罪法乙巳朝獻于衍慶宮詔頒捕蝗

圖于中外戊申宋使朝辭致答通謝書及誓書于宋主八月壬申更定遼東行使鈔法癸酉如建春宮己丑以戶部尚書高汝礪等為宋生日使庚寅如秋山九月甲子遣吏部尚書賈守謙等一十三人與各路按察司官推排民戶物力乙丑至自秋山冬十月辛未以吏部郎中郭鄂為高麗生日使辛巳宋高麗夏遣使來賀夏國有兵遣使來告癸未更定安泊強竊盜罪格辛卯以軍民共譽為廉能官條附善最法十一月丁酉朔詔諸路

按察使並兼轉運使初設三司使掌判鹽鐵度支勸農
事以樞密使赫舍哩子仁兼三司使癸卯詔戒諭尚書
省曰國家之治在于紀綱紀綱所先賞罰必信今乃上
自省部之重下逮司縣之間律度勿循私懷自便遷延
曠歲苟且成風習此為恒從何致理朝廷者百官之本
京師者諸夏之儀其勗自今各懲已往遵繩奉法竭力
赴功無枉撓以循情無依違而避勢壹歸于正用範乃
民是日御臨武殿試護衛丁未勅諭臨潢泰州路兵

馬都總管承裔等修邊備乙卯上不豫丙辰崩于福安殿年四十一大安元年春正月謚曰憲天光運仁文義武神聖英孝皇帝廟號章宗二月甲申葬道陵

贊曰章宗在位二十年承世宗治平日久宇內小康乃正禮樂省刑法定官制典章文物粲然成一代治規又數問羣臣漢宣綜核名實唐代考課之法蓋欲跨遼宋而比跡於漢唐亦可謂有志於治者矣然婢寵擅朝冢嗣未立疏忌宗室而傳授非人向之所謂維持鞏固於

久遠者徒為文具而不得為後世子孫一日之用金源氏從此衰矣昔楊雄氏有云秦之有司負秦之法度秦之法度負聖人之法度蓋有以夫

金史卷十二

欽定四庫全書

金史卷十三

元中書右丞相總裁托克托等脩

本紀第十三

衛紹王

衛紹王諱永濟小字興勝更諱永濟章宗時避顯宗諱
詔改允為永世宗第七子母曰元妃李氏衛王長身美
髯鬚天資儉約不好華飾大定十一年封薛王是歲進

封滕王十七年授世襲明安二十五年加開府儀同三司二十六年為祕書監明年轉刑部尚書又明年改殿前都點檢二十九年世宗崩章宗即位進封潞王起復判安武軍節度使五月至冀州以到任表謝賜詔優答明昌二年進封韓王四年改判興平軍五年改沁南軍承安二年改封衛王三年改昭義軍泰和元年改判彰德府事五年改判平陽府初章宗誅鄭王永蹈趙王永中久頗悔之七年下詔追復舊封仍賜謚而永蹈無後

乃以衛王子阿禪為鄭王後賜衛王詔曰朕念鄭王自
棄天常以干國憲藁瘞曠野忽諸不祀歷歲既久深用
愴然親親之情有懷難置已詔追復舊爵改葬如儀稽
考古禮以卿之子阿禪為鄭王後謹其祭祀卿其悉之
已而改武定軍節度使八年十一月自武定軍入朝是
時章宗已感嗽疾衛王且辭行而章宗意留之章宗初
年雅愛諸王置王傅府尉官以傳導德義及永中永蹈
之誅由是疏忌宗室遂以王傅府尉檢制王家苛問嚴

密門戶出入皆有籍而衛王乃永蹈母弟柔弱鮮智能
故章宗愛之既無繼嗣而諸叔兄弟多在章宗皆不肯
立惟欲立衛王故於辭行留之無何章宗大漸元妃李
氏黃門李新喜平章政事完顏匡定策章宗崩匡等傳
遺詔立衛王衛王固讓乃承詔舉哀即皇帝位于柩前
明日羣臣朝見于大安殿詔路府州縣為大行皇帝服
七日

大安元年正月辛丑飛星如火起天市垣有尾跡若赤

龍壬戌改元大赦立元妃圖克坦氏為皇后二月己丑朔
太白晝見經天壬辰章宗內人范氏損其遺腹以詔內
外初章宗遺詔內人有娠者兩人生男則立為儲貳至
是平章政事布薩端等奏承御賈氏當以十一月免乳
今則已出三月范氏產期合在正月醫稱胎氣有損用
藥調治脉息雖和胎形已失范氏願削髮為尼封皇子
六人為王三月甲辰道陵禮成大赦詔曰自今於朕名
不連續及昶詠等字不須別改以平章政事布薩端為

右丞相四月庚辰殺章宗元妃李氏及承御賈氏以平
章政事完顏匡為尚書令五月高麗賀即位試宏詞科
七月幸海王莊臨奠魯國公主八月萬秋節宋遣使來
賀九月如大房山謁奠睿陵裕陵道陵百官表請建儲
不允十月歲星犯左執法己卯詔戒勵風俗十一月平
陽地震有聲如雷自西北來十二月詔平陽地震人戶
三人死者免租稅一年二人及傷者免一年貧民死者
給葬錢五千傷者三千尚書令申王完顏匡薨右丞相

布薩端為左丞相進封兄越王永功為譙王御史大夫
張行簡為太保

二年正月庚戌朔日中有流星出大如盆其色碧向西
行漸如車輪尾長數丈沒于蜀中至地復起光散如火
二月客星入紫微垣光散為赤龍地大震有聲如雷以
禮部侍郎耿端義為叅知政事四月校大金儀禮北方
有黑氣如大道東西亘天徐邳州河清五百餘里以告
宗廟社稷五月詔儒臣編續資治通鑑六月大旱下詔

罪己賑貧民闕食者曲赦西京太原兩路褻犯死罪減一等徒以下免丙寅地震七月地震八月地震乙丑立子胙王從恪為皇太子萬秋節宋遣使來賀獵于近郊夏人侵葭州九月地大震乙未詔求直言招勇敢撫流亡庚子遣使慰撫宣德行省軍士丙午京師戒嚴上日出巡撫百官請視朝不允辛亥宣德行省罷癸丑詔撫諭中都西京清滄被兵民戶十一月獵于近郊中都大悲閣東渠內火自出逾旬乃滅閣南剝竿下石罅中火

自出人近之即滅俄復出如是者復旬日中都火燼民居十二月辛酉朔日有食之是歲大饑禁百姓不得傳說邊事

三年正月乙酉朔宋高麗夏遣使來賀熒惑入氏中二月熒惑入房宿有大風從北來發屋折木通玄門重闕折東華門重闕折閏月熒惑犯鍵閉星三月大悲閣災延及民居有黑氣起北方廣長若大堤內有三白氣貫之如龍虎狀括民間馬令職官出馬有差四月大元太

祖法天起運聖武皇帝來征遣西北路招討使鈕祜祿
哈達乞和平章政事通吉遷嘉努叅知政事和碩行省
事備邊西京留守赫舍哩呼沙呼行樞密院事叅知政
事鄂屯忠孝為尚書右丞戶部尚書梁瑄為叅知政事
六月壬寅更定軍前賞罰格八月詔獎諭行省官慰撫
軍士遷嘉努和碩自撫州退軍駐宣平河南大名路軍
逃歸下詔招撫之九月遷嘉努和碩敗績于會河堡居
庸關失守禁男子不得輒出中都城門大元前軍至中

都中都戒嚴叅知政事梁瑋鎮撫京城十月每夜初更
東西北天明如月初出經月乃滅熒惑犯壘壁陣上京
留守圖克坦鎰遣同知烏克遜鄂屯將兵二萬衛中都
泰州刺史珠格高琪屯通玄門外上巡撫諸軍罷宣德
行省十一月殺河南陳言人郝贊以上京留守圖克坦
鎰為右丞相簽中都在城軍赫舍哩呼沙呼棄西京走
還京師即以為右副元帥權尚書左丞是時德興府弘
州昌平懷來縉山豐潤密雲撫寧集寧東過平灤南至

清滄由臨潢過遼河西南至忻代皆歸大元初圖克坦
鎰請徙桓昌撫百姓入內地上信梁瑄議責鎰曰是自
感境土也及大元定三州上悔之至是鎰復請置行省
事于東京備不虞上不悅曰無故遣大臣動搖人心未
幾東京不守上乃大悔右副元帥呼沙呼請兵二萬屯
宣德詔與三千人屯媯川平章政事遷嘉努叅知政事
和碩坐覆全軍遷嘉努除名和碩責授咸平路兵馬總
管萬戶奎騰屯古北口十二月簽陝西兩路漢軍五千

人赴中都太保張行簡左丞相布薩端宿禁中議軍事
左丞相布薩端罷

崇慶元年正月朔改元赦宋夏遣使來賀右副元帥呼
沙吁請退軍屯南口詔數其罪免之三月大旱遣使冊
李遵頊為夏國王以御史大夫福興為叅知政事叅知
政事孟鑄為御史大夫夏人犯葭州延安路兵馬總管
完顏諾爾布禦之五月簽陝西勇敢軍二萬人射糧軍
一萬人赴中都括陝西馬武安節度使致仕賈鉉起復

叅知政事叅知政事福興為尚書左丞詔賣空名勅牒
河東陝西大饑斗米錢數千流莩滿野以南京留守布
薩端為河南陝西安撫使提控軍馬七月有風自東來
吹帛一段高數十丈飛動如龍形墜於拱辰門八月萬
秋節以兵事不設宴十月曲赦西京遼東北京十一月
賑河東南路南京路陝西東路山東西路衛州旱災十
二月夏國王李遵頊謝封冊

至寧元年正月賑河東陝西饑二月詔撫諭遼東知大

名府事烏庫哩誼謀不軌伏誅三月太陰太白與日並見相去尺餘五月改元詔諭咸平路契丹部人之嘯聚者起呼沙呼復為右副元帥領武衛軍三千人屯通玄門外陝西大旱六月夏人犯保安州殺刺史犯慶陽府殺同知府事以戶部尚書胥鼎刑部尚書王維為叅知政事八月尚書左丞完顏元努將兵備邊詔賜賚軍官軍士大霧晝晦治中福海別將兵屯城北辛卯呼沙呼矯詔以誅反者招福海執而殺之奪其兵壬辰自通玄

門入殺知大興府圖克坦南平刑部侍郎圖克坦默呼
於廣陽門西福海男符寶珊延都統寶古納率衆拒戰
死之呼沙呼叩東華門遣人呼守直親軍百戶棟爾五
十戶富察祿錦不應許以世襲明安三品官職亦不應
都點檢圖克坦威赫絕而出護衛色埒默掎鐐啓門呼
沙呼以兵入宮盡逐衛士代以其黨自稱監國都元帥
癸巳逼上出宮以素車載至故邸以武衛軍二百人錮
守之尚宮左夫人鄭氏為內職掌寶璽聞難端居璽所

呼沙呼遣黃門入收璽鄭曰璽天子所用呼沙呼人臣
取將何為黃門曰今天時大變主上猶不自保况璽乎
御侍當思自脫計鄭厲聲罵曰若輩宮中近侍恩遇尤
隆君難不以死報之反為逆豎奪璽耶我死可必璽必
不與遂瞑目不語黃門出呼沙呼卒取宣命之寶偽除
其黨酬勞為德州防禦使烏庫哩道拉順天軍節度使
提控宿直將軍圖克坦金壽永定軍節度使及其餘黨
凡數十人皆遷官遂使宦者李思中害上於邸誘奉御

和尚使作書急召其父左丞元努議事元努以軍來并
其子皆殺之九月甲辰宣宗即位丁未詣邨臨奠伏哭
盡哀勅以禮改葬呼沙呼請廢為庶人詔百官議于朝
堂議者二百餘人太子少傅鄂屯忠孝侍讀學士富察
思忠請從廢黜戶部尚書武都拾遺田庭芳等三十人
請降為王侯太子太保張行簡請用漢昌邑王晉海西
公故事侍御史完顏思楚等十人請降復王封呼沙呼
固執前議宣宗不得已乃降封東海郡侯昭雪道陵元

妃李氏承御賈氏十月辛亥元帥右監軍珠格高琪殺
呼沙呼于其第呼沙呼者赫舍哩執中也宣宗乃下詔
削其官爵贈實古納順州刺史珊延順天軍節度使凡
從二人拒戰者千戶賞錢五百貫穆昆三百貫佛寧散
軍二百貫各遷官兩階戰沒者贈賞付其家棟爾加龍
虎衛上將軍再遷宿直將軍富察祿錦加定遠大將軍
武衛軍鈐轄實古納子尚幼給俸八貫石勅有司候其
年十五以聞貞祐四年詔追復衛王諡曰紹

贊曰衛紹王政亂於內兵敗於外其滅亡已有徵矣身
弑國蹙記注亡失南遷後不復紀載皇朝中統三年翰
林學士承旨王鶚有志著論求大安崇慶事不可得采
撫當時詔令故金部令史竇祥年八十九耳目聰明能
記憶舊事從之得二十餘條司天提點張正之寫災異
十六條張承旨家于本載舊事五條金禮部尚書楊雲
翼日錄四十條陳老日錄三十條藏在史館條件雖多
重複者三之二惟所載李妃完顏匡定策通吉遷嘉努

兵敗赫舍哩執中作難及日食星變地震氛祲不相背
蓋今校其重出刪其繁雜章宗實錄詳其前事宣宗實
錄詳其後事又於金掌奏目女官大明居士王氏所紀
得資明夫人援壘事附著于篇亦可以存其梗槩云爾



金史卷十三

欽定四庫全書

史部

金史卷十四

五

詳校官國子監蔡酒覺羅喜善

內閣中書_臣李彤覆勘

總校官舉人_臣章維桓

校對官學錄_臣常循

謄錄監生_臣張彭齡

欽定四庫全書

金史卷十四

元中書右丞相總裁托克托等修

本紀第十四

宣宗上

宣宗繼天興統述道勤仁英武聖孝皇帝諱珣本名烏達布

顯宗長子母曰昭華劉氏大定五年癸未歲生世宗養于宮

中十八年封溫國公加特進二十六年賜今名二十九年進

封豐王加開府儀同三司累判兵吏部又判永定彰德等軍
承安元年進封翼王泰和五年改賜名從嘉八年進封邢王
又封昇王所至著祥異至寧元年八月衛紹王被弑圖克坦銘
等迎于彰德府既至京親王百官上表勸進九月甲辰即
皇帝位于大安殿以赫舍哩呼沙呼為太師尚書令兼都
元帥封澤王乙巳諭尚書省事有規畫者皆即規畫悉依世
宗所行行之丙午以駙馬雄名第賜呼沙呼丁未諭宰臣曰
朕即大位羣臣凡有所見各直言勿隱臨奠于衛紹王第有

司奏舊禮當設坐哭上命撤坐伏哭盡哀勅有司以禮
改葬戊申御仁政殿視朝賜呼沙呼坐呼沙呼不辭辛
亥封皇子守禮為遂王守純為濮王皇女溫國公主薨
王永升薨上親臨奠大元遣伊埒齊來壬子改元貞祐
大赦恩賚中外臣民有差丙辰左諫議大夫張行信上
章言從節儉廣聽納明賞罰三事尚書右丞相圖克坦
鑑進左丞相封廣平郡王庚申澤王呼沙呼等議廢故
衛王為庶人上曰朕徐思之以諭卿等壬戌授呼沙呼

中都路和囉囉圖世襲明安丙寅詔六品以下官事有
可言者言之無隱閏月戊辰朔拜日仁政殿自是每月
吉為常授尚書左丞相圖克坦鑑中都路達魯明安庚
午上復舊名珣詔所司告天地廟社前所更名二字自
今不須迴避辛未詔尊皇妣為皇太后是日皇妃皇子
至自彰德府遣使使宋已卯左諫議大夫張行信上疏
請立皇太子甲申立子守忠為皇太子丙戌詔降故衛
王為東海郡侯甲午減定監察御史為十二員冬十

月丁酉朔京師戒嚴辛丑大元伊埒齊來乙巳詔應遷
加官賞諸色人與本朝人一體庚戌勅有司皇太子冊
禮俟邊事息然後舉行辛亥元帥右監軍珠格高琪戰
于城北凡兩敗績而歸就以兵殺呼沙呼於其第持其
首詣闕待罪赦之仍授左副元帥壬子殿前都點檢赫
舍哩特默等補外官張行信上封事言正刑賞擇將帥及
珊延實古納之寬大元兵下涿州設京城鎮撫彈壓官
置招賢所癸亥放宮女百三十人十一月戊辰夏人攻會

州圖克坦酬爾出兵擊走之庚午將乞和大元詔百官
議于尚書省以橫海軍節度使承暉為尚書右丞耿端
義為參知政事癸未詔贈死事費摩福興及珊延寶古
納官大元兵徇觀州刺史高守約死之又徇河間府滄
州乙未定亡失告身文憑格十二月丁酉朔上御應天
門詔諭軍士仍出銀賜之平章政事圖克坦公弼進尚
書右丞相尚書右丞承暉進都元帥兼平章政事左副
元帥珠格高琪進平章政事兼前職

二年春正月丁卯朔以邊事未息詔免朝賀辛未大元
兵徇彰德府知府事洪果玖珠死之宋人攻秦州統軍
使舒穆魯仲溫擊却之癸未有司請權止今年禘享朝
獻原廟及皇太后冊立從之乙酉徵處士王澮不至大
元兵徇益都府命有司復議本朝德運乙未大元兵徇
懷州沁南軍節度使宋宸死之二月丙申朔壬子大元
伊瑀齊扎巴來丙辰罷按察司壬戌大元伊瑀齊復來
三月辛未遣承暉詣大元請和丁丑赦國內癸未京師

大括粟甲申大元伊瑋齊扎巴來詔百官議於尚書省
戊子以濮王守純為殿前都點檢兼侍衛親軍都指揮
使權都元帥府事庚寅奉衛紹王公主歸于大元太祖
皇帝是為公主皇后辛卯詔許諸人納粟買官京城戒
嚴壬辰大元兵下嵐州鎮西軍節度使烏庫哩仲溫死
之夏四月乙未朔以知大興府事胥鼎為尚書右丞戊
戌奉遷昭聖皇后柩于新寺時山東河北諸郡失守惟
真定清沃大名東平徐邳海數城僅存而已河東州縣

亦多殘燬兵退命布薩安貞等為諸路宣撫使安集遺
黎至是以大元允和議大赦國內癸卯權厝昭聖皇后
于新寺甲辰詔有司具陣亡人子孫以備錄用丁未以
都元帥承暉為平章政事庚戌左丞相兼修國史廣平
郡王圖克坦鑑薨乙卯尚書省奏幸南京詔從之己未
葬衛紹王五月癸酉承暉加金紫光祿大夫封定國公
尚書左丞穆延盡忠加崇進封申國公甲戌霍王從彝
薨乙亥輟朝上決意南遷詔告國內太學生趙昉等上

章極論利害以大計已定不能中止皆慰諭而遣之詣
原廟奉辭戊寅將發雨不果行以南京留守布薩端等
嘗請臨幸及行先詔諭之辛巳詔遷衛紹鰭厲王家屬
于鄭州壬午車駕發中都是日雨至甲申止丙戌次定
興禁有司扈從踐蹂民田丁亥次安肅州元帥右監軍
完顏弼以兵迎見癸巳次中山府勅扈從軍所踐禾稼
計直酬之六月甲午朔以按察轉運使高汝礪為參知
政事癸丑次內邱縣大元伊均齊來戊午次彰德府曲

赦其境內庚申次鉅橋鎮是日南京行宮竇鎮閣灾壬戌次宜村黃龍見西北秋七月車駕至南京詔立元妃溫都氏為皇后八月甲午以立后百官上表稱賀庚子皇太子至自中都丁未夏人入邊命移文責之甲寅罷經畧司應奉翰林文字完顏蘇呼上書言事九月壬戌朔日有食之皇孫生癸亥山東路報萊州之捷辛未立監察御史陞黜格庚辰詔訓練軍士丁亥諭宣徽院正旦生辰不須進物太白晝見于軫戊子禁軍官圍獵冬

十月甲午詔遣官市木波西羌馬陝西軍戶戰死者給糧膳其家丁酉大元兵徇順州勸農使王晦死之壬寅左副元帥兼尚書左丞穆延盡忠進平章政事以御史中丞富珠哩德裕為參知政事簽樞密院事曲赦中都路乙卯遣參知政富珠哩德裕行尚書省于大名府丙辰大元兵收成州諭大名行省貶損用度德州防禦使完顏酬努伏誅十一月丁卯以御史大夫布薩端為尚書左丞相曲赦山東路辛未詔賜衛紹王家屬既稟詔

有司答夏國牒丙子許諸色人試武舉蘭州譯人程陳
僧叛西結夏人為援辛巳癸惑犯房宿鈞鈴星癸未曲
赦遼東路勅罷宣撫司輒擬官十二月戊戌遣真定行
元帥府事永錫等援中都頌勸農詔丁未以和議既定
聽民南渡乙卯登州刺史狀格伏誅流其妻孥大元兵
徇懿州節度使高間山死之

三年春正月辛酉朔宋遣使來賀壬戌遣內侍諭永錫
防邊毋以和議為辭癸亥曲宴羣臣宋使定文武五品

以上侍坐員遂為常制乙丑詔宣撫阿哈總管和卓討賊劉二祖張汝楫戊辰尚書省言內外軍人入粟補職者多行伍浸虛請俟平定應監差者與三酬門戶有職事者陞一等其子弟應廢者罷之上可其奏乙亥夏人犯環州北京軍亂殺宣撫使鄂屯襄丁丑右副元帥富察齊勤以其軍降於大元辛巳皇太子疾輟朝乙酉皇太子薨二月辛卯環州刺史烏庫哩延壽及錫默摩囉歡等敗夏人于州境詔進官有差大元伊埒齊來壬辰

上臨奠皇太子殯所有司奏辰日不哭上曰父子至親何可拘忌命御史中丞李英元帥左都監烏庫哩慶壽領兵護饗中都付以空名宣勅許視功遷敎逗撓者治以軍律乙未改寧邊州隸嵐州丁酉詔諸色人遷官並視女直人有司妄生分別以違制論從戶部郎中鄂屯阿古請也辛丑勅宰臣饋伊瑋齊酒饌壬寅頒獎諭官吏軍民詔曲赦招撫北京作亂者丙午尚書省以南遷後吏部秋冬置選南京春夏置選中都赴調者不便請

併選于南京從之武清縣巡檢梁佐柳口巡檢李耀珠以誅亂賊張暉劉永昌等功進官有差皆賜姓完顏丁未山東宣撫使布薩安貞遣提控布薩瑠嘉等破賊揚安兒步騎三萬殲其衆降偽頭目三百餘人脅從民三萬餘戶戊申減沿邊州府官資考有差壬子立保城無虞及捕獲姦叛遷賞格乙卯勅奏急事不拘假日丁巳日初出赤如血欲沒復然戊午大風隆德殿鴟尾壞三月壬辰詔河北州縣官令文武五品以上辟舉不聽以

他事差占仍勒終任有勞績者但升選領之職應降罰者亦止本處居住時河北殘燬吏治多苟且以求代易故著是令癸亥詔百官各陳防邊利害封章以聞丙寅勅河東河北大名長貳官訓練隨處義兵鄰境有警責其揀援降人自拔歸國者遷職仍列其姓名以招諭來者沿河州縣官罷軟不勝職任汰去令五品已上官公舉仍許今季到部人內先擇能者量緩急易之丁卯安武軍節度使張行信上書言急務四事庚午諭遼東

宣撫使布希萬努選精銳屯瀋州廣寧以候進止壬申
長春節宋遣使來賀戊寅諭尚書省歲旱議弛諸處碾
磑以其水溉民田己卯雨自去冬不雨雪至是始雨勸
農使李華言河北州縣官吏多求河南差占以避難宜
發元任領戍兵者不可離則別注以往庚辰御史臺言
在京軍官及委差官芻糧券例悉同征行乞減其給樞
密院委差有俸人吏非征行不必給皆從之勅尚書省
入粟補官者毋括其戶為軍有司議賞軍功毋有沮格

壬午山東宣撫司報大沫堦之捷瓜爾佳錫爾格及默
呼擒賊渠劉二祖等斬之前後殪賊萬計西京軍民變
遣官撫諭之已丑禁州縣置刃於杖以決罪人前年京
兆治中李友直私逃華州結同知防禦使馮朝河州防
禦判官郝遵甫平涼府同知致仕楊庭秀水洛縣主簿
宿徽等圍集州民號忠義扈駕都統府相挺為亂殺其
防禦判官完顏巴錦及城中女直人以書約都統楊珪
為府兵所得珪諱之請自效誘友直等執之麾所招千

餘人納仗阮諸城下時京師道路隔絕安撫司以便宜
族友直等至是以狀聞乃贈巴錦及被害官軍十餘人
各一官賻錢三百貫夏四月癸巳河東宣撫司胥鼎言
利害十三事長勝軍都統楊珪伏誅丙申河南路蝗遣
官分捕上諭宰臣曰朕在潛邸聞捕蝗者止及道傍使
者不見處即不加意當以此意戒之權參知政事德升
言舊制夏至後免朝四日一奏事上曰此在平時可也
方今多故勿謂朕勞遂云當免但使國事無廢則善矣

己亥曲赦山東路癸卯籍赴選監當官為軍乙巳罷都
南行尚書六部侯摯言九事曲赦富察齊勤脅從之黨
募能殺獲齊勤者以其官官之丙午以調度不給凡隨
朝六品以下官及承應人罷其從已人力輸傭錢經兵
州府其吏減半司縣吏減三之一其餘除開封府南京
轉運司外例減三之一有祿官吏被差不出本境者並
罷給券出境者以其半給之脩內司軍夫亦減其半丁
未故皇太子啓敢賜諡曰莊獻戊申權葬迎朔門外詔

自今策論詞賦進士第一甲第一人特遷奉直大夫第
二人以下經義第一人並儒林郎第二甲以下徵事郎
同進士從事郎經童將仕郎壬子艾國公從厚薨詔遣
使同山西宣撫司選其民勇健者為軍諭有司勿拒河
北避兵之民所至加存卹用山東西路宣撫副使完顏
弼言招大沫堠渠賊孫邦佐張汝楫以五品職下詔滿
洗其罪乙卯詔檢覈朝廷差遣官劾無故稽留中道
者罪之丙辰諭田琢留山東流民少壯者充軍老幼者

令就食於邢洺等州欲趨河南者聽上議遣新軍六千
餘及所募二千七百人援中都宰臣以為行宮單弱親
軍不可遣遂止五月庚申招撫山西軍民仍降詔諭之
是日中都破尚書右丞相兼都元帥定國公承暉死之
戶部尚書任天寵知大興府事高霖皆及于難壬戌降
空名宣勅紫衣師德號度牒以補軍儲辛未立皇孫鏗
為皇太孫癸酉劉炳上書言十事辛巳上諭宰臣多事
之秋陳言者悉送省恐卿等不暇朕于宮中置局命方

正官數員擇可取者付出施行何如宰臣請如聖諭詔
削納補官恩例戊子謀伐西夏遣大臣鎮撫京兆秋七
月戊午朔大元兵收濟源縣己未徵弓箭于内外品官
三品以上三副四品五品二副餘以等級徵之庚申置
陳頴漕運提舉官以戶部勾當官往來督察有星如太
白色青白有尾出紫微垣北極傍入貫索中上聞河北
譏察官有要求民財始聽渡河者避兵民至或餓死自
溺特命御史臺體訪之又禁隨朝職官敍民碾碓以

自營利詔河間孤城移其軍民就粟清州括民間騾付
諸軍與馬參用辛酉議括官田及牧馬地以贍河北軍
戶之徙河南者已為民佃者俟獲畢日付之羣臣迭言
其不便遂寢癸亥詔河北郡縣軍須並減河南之半定
尚書所造諸符樞密院鹿宣撫司魚統軍司虎丙寅遣
參知政事高汝礪往河南便宜措置糧儲制品官納弓
箭之令丁憂致仕者免甲戌借平陽民租一年詔職官
更兵亡失告身見任者保識即重給之妄冒者從詐偽

法丙子尚書省奏給皇太孫歲賜錢上不從曰襁褓
兒安所用之詔致仕官俸給比南征時減其半丁丑肅
宗神主至自中都奉安于明俊殿戊寅月入畢宿中戊
夜犯畢大星已卯明德皇后神主至自中都裁損宮中
歲給有差甲申詔尚書省行六部太多其令各路運司
兼之改交鈔名貞祐寶券八月戊子朔以陝西統軍使
完顏哈達簽樞密院事己丑制軍府庶事樞密院官須
與經歷官裁決經歷議是而院官不從許直以聞癸巳

詔遣官體究京西路新遷軍戶內申論尚書省職官犯罪大者即施行之小者籍之事定始論其罪諭樞密院薩哈連所簽軍有具戒僧人可罷遣之己亥詔武舉官非見任及已從軍者隨處調赴京師別為一軍以備用被薦未授官者量才任之庚子上慮平陽城大兵食不足議棄之宰臣持不可前冀州教授鈕祜祿特烈集義兵出方畧遇土寇兵後攝州復立州治積芻糧招徠民戶至五萬置東西路總管府于歸德府及徐亳二州特

遷三官升正五品職以太常卿侯摯為參知政事行中書省于河北東西兩路太祖御容至自西京奉安于啓慶宮甲辰置行樞密院于徐州歸德府詔諸職官不拘何從出身其才可大用者尚書省具以聞丙午山東西路宣撫司完顏弼表選授同知東平府事張汝楫將謀復叛密遣人招同知益都府事孫邦佐邦佐斬其人馳報弼弼殺汝楫及其黨萬餘人承制陞邦佐德州防禦使餘立功者賞有差上嘉弼功加崇進封密國公詔獎

諭之丁未詔近臣舉良將加孫邦佐昭毅大將軍泰定
軍節度使仍官其子戊申東平益都太原潞州置元帥
府大赦已酉監察御史許古獻恢復中都之策紅襖賊
掠城武宣撫副使延扎天澤討走之斬首數百級進天
澤一官將校有功者命就遷賞命侯摯招邢州賊程邦
傑以官不從則誘其黨圖之減戶部幹辦官四員及差
委官有差壬子置行省于陝西乙卯增沁河關糴之法
十取其八以抑販粟之弊仍嚴禁私渡增步軍萬人戍

京以西四萬人戍京以東選陝西騎兵二千增京畿之
衛諭陝西監守延安臨洮環慶蘭會保安綏德平涼德
順鎮戎涇原鄜坊邠寧乾耀等處要害分渭南州郿步
兵屯平原令宣撫使治邠州副使治同州之澄城以統
之更以步騎守汧渭諸津丙辰元帥左監軍兼知真定
府事永錫坐援中都失律削官爵杖之八十九月丁巳
朔戶部侍郎鄂屯阿古言國家多故職官往往不仕乞
限以兩季違者勿復任用上嫌其太重命違限者止奪

三官降職三等仍永不升注辛酉除名永錫特遣信武將軍息州刺史甲子諭宰臣沿淮塘路以南地曠授民業今為豪勢據奪者其令有司察之丙寅樞密院言陝西河東世襲蕃部巡檢昨與世襲明安穆昆例罷其俸今邊事方急宜仍給之庶獲其用又西邊弓箭手有才武出衆獲功未推賞者令宣撫司覈實以聞從之丁卯以秋稼未獲禁軍官圍獵詔授隱士王滄太中大夫右諫議大夫充遼東宣撫司參謀官戊辰遙授武寧軍節

度副使圖克坦烏登告平章政事穆延盡忠逆謀詔有
司鞠之設潼關提控總領軍馬等官辛未置河北東路
行總管府于原武陽武封邱陳留延津通許杞諸縣以
治所徙軍戶命司屬令和尙等護治鞏國公安春第上
謂宰臣曰安春所為不慎或至犯法舍之則理所不容
治之則失親親之道但當設官以防之耳安春尋以不
法謫博州防禦使黜衛紹王母李氏光獻皇后尊諡神
主在太廟畫像在衍慶宮並遷出之陳州鎮防軍段仲

連進羊三百詔遷三官命右丞汝礪詣陳州規畫糧儲
壬申以蘇門縣為輝州癸酉朝謁世祖太祖御容于啓
慶宮行獻享禮始用樂賜東永昌姓為溫都氏包世顯
包疙疸為烏庫哩氏多隆烏為哈薩喇氏何定為必喇
氏馬福德馬栢壽為瓜爾佳氏各遷一官甲戌朝謁太
宗熙宗睿宗御容行獻享禮詔開滑濬濟曹勝諸州置
連珠寨如衛州乙亥詔河北山東等路平涼慶陽臨洮
府涇邠秦鞏德順諸州經兵四品以下職事官並以二

十月為滿募隨處主帥及官軍義軍將校有能率衆復
取中都者封王遷一品階授二品職能戰却敵善誘降
人取附都州縣者予本處長官散官隨職遷授餘州縣
遞減二等紅襖賊周元兒陷深祁州東鹿安平無極等
縣真定帥府以計破之斬元兒及殺其黨五百餘人丁
丑詔司縣官能募民進糧五千石以上減一資考萬石
以上遷一官減二資考二萬石以上遷一官升一等注
見闕諸色人以功賜國姓者能以千人敗敵三千人賜

及總麻以上親二千人以上賜及大功以上親千人以上賜止其家庚辰陝西宣撫司來上第五將城萬戶楊再興擊走夏人之捷壬午以空名宣勅付陝西宣撫司凡夏人入寇有能臨陣立功者五品以下並聽遷授乙酉置大名府行總管府于柘城縣以治所徙軍戶冬十月丙戌朔翰林侍讀學士權參知政事烏庫哩德升出為集慶軍節度使兼亳州管内觀察使丁亥尚書右丞汝礪言河北軍戶之徙河南者宜以係官閒田及牧馬草地之可耕者賜之使自耕以食

而罷其月糧上從其請命右司諫馮開隨處按視人給三十畝夏人入保安都統完顏果嘉努破之攻延安戍將又敗之是日捷至戊子御史中丞圖克坦思忠為參知政事已丑平章穆延盡忠下獄既久監察御史許古言盡忠逮繫有司此必重罪而莫知其由甚駭公聽乞遣公正重臣鞠之如得其實明示罪目以厭中外之心書上不報庚寅遂誅盡忠癸巳罪狀盡忠告中外詔樞密副使布薩安貞行樞密院于徐州戊戌遼東宣撫司報敗瑠格之捷甲辰

詔求廣平郡王承暉之後得其猶子厯亭縣丞永懷以
為器物直長丙午夏人陷臨洮陝西宣撫副使完顏和
索哩被執庚戌詔尚書左丞相布薩端兼都元帥行尚
書省于陝西辛亥蒙古綱奏昨被旨權山東路宣撫副
使屯東平行至徐北岸北兵已偪徐不可往詔樞密副
使布薩安貞權於沿河任使之壬子以同華舊屯陝西
兵及河南所移步騎舊隸陝州宣撫司者改隸陝西行
省召中奉大夫襲封衍聖公孔元措為太常博士上初

用元措於朝或言宣聖墳廟在曲阜宜遣之奉祀既而
上念元措聖人之後山東寇盜縱橫恐罹其害是使之
奉祀而反絕之也故有是命遼東賊布希萬努僭號改
元天泰十一月丙辰朔河北行尚書省侯摯入見詔河
北西路宣撫副使田琢自濬徙其兵屯陝戊午樞密院
進王世安取盱眙楚州之策遂以世安為招撫使與泗
州元帥府所遣人同往淮南計度其事戊辰夏人犯綏
德之克戎寨官軍敗之犯綏平又敗之賞有功將士及

來告捷者參知政事圖克坦思忠言今陳言者多掇細
故乞不送省止令近侍局度其可否發遣上曰若爾是
塞言路凡係國家者豈得不由尚書省乎庚午上與尚
書左丞汝礪商畧遣官括田賜軍之利害汝礪言不便
者數端乃詔有司罷其令仍給軍糧之半其半給詣實
之價壬申遣參知政事侯摯祭河神于宜村甲戌伊喇
托卜嘉以萬人破夏人數萬于熟羊寨丙子詔市民間
輓車羸疾牝馬置羣牧中以圖滋息知臨洮府圖們呼

圖克們破夏人八萬於城下丁丑監察御史陳規劾參知政事侯摯上不允所言而慰答之庚辰上謂宰臣曰朕恐括地擾民罷其令矣官荒牧馬地軍戶願耕者聽已為民承種者勿致舊例點檢左右將軍近侍局官護衛承應人秩滿皆賜匹帛雖所司為之製造然不免賦取於民近亦罷之止給寶券至於朕所服御亦以官絲付太府監織之自今勿復及民也大元兵徇彰德府知府圖們色埒默死之十二月乙酉朔徙朔州民分屯嵐

石隰吉絳解等州戊子以軍事免樞密院官朝已丑侯
摯復行尚書省于河北庚寅太白晝見壬辰詔免元日
朝賀乙未勅贈昭聖皇后三代官爵太康縣人劉全時
溫東平府民李寧謀反伏誅戊戌陝西行元帥府乞益
兵以田琢之衆隸之仍獎以詔壬寅詔林州刺史惟宏
與都提控蘇爾坦同經理邊事諸將功賞次第便宜行
之乙巳大元兵徇大名府癸丑皇太孫薨以殤無祭享
之制戒勿勞民諭宣徽院免元日親王公主進酒甲寅

禮官奏正旦宋遣使來賀不宜輟朝不舉樂服色如常
儀詔臨洮路兵馬都總管圖們呼圖克們進官三階再
任

四年春正月癸亥監察御史田迴秀條陳五事丙寅紅
襖賊犯泰安德博等州山東西路行元帥府敗之丁卯
諭御史臺曰今旦視朝百官既拜之後始聞開封府報
衙聲四方多故之秋弛慢如此可乎中丞福興素號謹
于官事者當一詰之己巳尚書右丞高汝礪進左丞庾

午大元兵收曹州辛未參知政事侯摯進尚書右丞壬申太原元帥左監軍烏庫哩德升招其民降北者得四千三百三十餘人癸酉詔謚故皇太孫曰冲懷更定捕獲偽造寶券者官賞乙亥以殿前都點檢皇子遂王守禮為樞密使樞密使濮王守純為平章政事己卯立遂王守禮為皇太子庚辰詔免逃戶租壬午言者請遣官勸農至秋成考其績以甄賞宰臣言民恃農以生初不待勸但寬其力勿奪其時而已遣官不過督州縣計頃

畝嚴期會而已吏卒因為姦利是乃妨民何名為勸上
是其言不遣二月甲申朔日有食之上不視朝詔皇太
子控制樞密院事大元兵圍太原乙酉以信武將軍宣
撫副使永錫簽樞密院事權尚書右丞皇太子既總樞
務詔有司議典禮以金鑄撫軍之寶授太子啟稟之際
用之平章政事高琪表乞致仕不允呂樞密院官問所
以備禦之策丁亥以河東南路宣撫使胥鼎為樞密副
使權尚書左丞行省于平陽鼎方抗表求退詔勉諭就

職因有是命行省左丞相布薩端先亦告老遣太醫往鎮護視其疾戊子宰臣以皇太子既立服御儀物悉與已受冊同今邊事未寧請少緩冊寶之禮從之戊戌免親王公主長春節入賀致禮己亥大元兵攻下霍山諸隘甲辰命參知政事李革為修奉太廟使禮部尚書張行信提控修奉社稷權祔肅宗神主于世祖室奉始祖以下神主于隨室祭器以瓦代銅獻官以公服行事供張等物並從簡約庚戌詔凡死節之臣籍其數立廟致

祭壬子任國公瑋薨輟朝是月同知觀州軍州事張開復河間府滄獻等州并屬縣十有三表請赦旁郡脅從之臣又請以宣撫司空名宣勅二百道付之從權署補仍以糧繼其軍食詔樞密措畫三月乙卯以將修太廟遣李革奏告祖宗神主于明俊殿丁巳曲赦中都河北等路議軍戶給地事乙丑延州刺史溫薩克蘇上疏言皇太子宜選正人為師保丙寅長春節宋遣使來賀己巳以將修社稷遣太子少保張行信預告滄州經畧副

使張文破趙福復恩州丙子曲赦遼東路已卯處士王
澹以右諫議大夫復遷中奉大夫翰林學士仍賜詔褒
諭庚辰復邢州捷至夏四月己丑陝西行省來報秦州
官軍破妖賊趙用劉高二之捷遣官鞫單州防禦使布
薩倬之罪罷其城單州之役癸巳張開奏復清州等十
有一城詔遷官兩階賞將士有差甲午改賜皇太子名
守緒詔諭陝西路軍民丙申河北行省侯摯言比商販
粟渡河官遮糴其什八商遂不行民饑益甚請罷其令

從之河南陝西蝗丁酉太白晝見于奎己亥夏人巴鄂
特族都管汪三郎率番戶來歸以千羊進詔納之優給
其直辛丑侯摯言紅襖賊掠臨沂費縣之境官軍敗之
獲其黨訊之知其渠賊郝定僭號署官已陷滕兗單諸
州萊蕪新泰等十餘縣時道路不通宰臣請論摯為備
仍詔樞密院招捕蔡息行元帥府兵拔木隄關斬首千
級甲辰有司言扶風郿縣有蕪傷麥五月癸丑朔禮官
言太廟既成行都禮雖簡約惟以親行祔享為敬請權

不用鹵簿儀仗及宮縣樂舞從之山東行省上沂州之捷甲寅鳳翔及華汝等州蝗辛酉以尚書右丞侯摯行省事於東平己巳來遠鎮獲夏課者陳岳等知夏人將圖臨洮鞏州闕長安命陝西行省嚴為之備丙子上將以七月行祔享禮慮時雨有妨詔改用十月夏人修來羌城界河橋元帥右都監完顏薩布遣兵焚之俘馘甚多戊寅京兆同華鄧裕汝亳宿泗等州蝗六月戊子詔凡進奏帖及申尚書省樞密院關應密大事私發視者

絞誤者減二等制書應密者如之壬辰遼西偽瀛王張致遣完顏內赫張烏遜上表來歸詔授致特進行北京路元帥府事兼本路宣撫使內赫同知北京兵馬總管府烏遜同知廣寧府丙申歲星晝見于奎百有一日乃伏癸卯詔有司祈雨丁未河南大蝗傷稼遣官分道捕之罷河北諸路宣撫司更置經畧司壬子以旱詔參知政事李革審決京師冤獄秋七月癸丑朔昭義軍節度使必喇阿魯岱復威州及獲鹿縣飛蝗過京師甲寅山

東行省檄賊郝定等至京師伏誅乙卯以旱蝗詔中外
已未勅減尚食數品及後宮歲給縑帛有差辛酉監察
御史陳規上章條陳八事閏月壬午朔日有食之辛卯
復深州癸巳翰林學士完顏伯特進中興事跡甲午命
掌軍官舉奇才絕力之人提控都副統等官互舉其屬
頒舉官賞罰格許功過相除品官及草澤人有才武者
舉薦升降亦如之庚子詔河南陝西鎮防軍應廕及納
粟補官者當役如舊候事定乃遷赴銓八月甲寅太子

少保兼禮部尚書張行信定祔享親祀之儀以進上嘉納之三原縣僧廣惠進僧道納粟多寡與都副威儀及監寺等格從其言鬻之夏人入安塞堡元帥左監軍烏庫哩慶壽遣軍敗之壬戌賜張行信寶券二萬貫重幣十端旌其議禮之當乙亥詔諭中都民命大名招撫使募人持詔以往丙子大元兵攻延安己卯夏人入結耶背川官軍擊走之九月辛巳朔大元兵攻防州以簽樞密院事永錫為御史大夫領兵赴陝西便宜從事壬辰

大元兵攻代州經畧使鄂屯醜和尚戰沒以中尉衛完
顏諾爾布等使宋賀生日冬十月己未親王百官奉迎
祖宗神主于太廟招射生獵戶練習武藝知山徑者分
屯陝號要地命元帥左監軍必喇阿魯岱守潼關遙授
知歸德府事完顏仲元軍盧氏大元兵攻潼關西安軍
節度使尼瑪哈富勒呼戰沒辛酉上親行祔享禮甲子
祔享禮成赦乙丑詔諭河南官吏軍民以賞格募立功
之士命參知政事圖克坦思忠提控鎮撫京師伊喇卓

拉布屯關陝西寅詔京師具防城器械多鑿坎穽築垣
墻于隙地徙衛紹及錫厲王家屬于京師丁卯以奉安
社稷遣官預告戊辰命張行信攝太尉奉安社稷禮樂
咸殺其數詔吏禮兵工四部尚書董防城之役大元兵
徇汝州已巳沁河唯存通報小舟餘皆焚之庚午詔宿
糧州縣屯兵其簽民為兵者就署隊長以自防遏河東
行省胥鼎遣潞州元帥左監軍必喇阿魯岱以軍一萬
孟州經略使圖克坦伯嘉以軍五千由便道濟河趨關

陝自將平陽精兵援京師命樞府督軍應之辛未置官
領招賢所事命內外官採訪有才識勇畧能區畫防城
者具以聞得實超授仍賞舉主內負長才不為人知者
聽赴招賢所自陳壬申以龍虎衛上將軍費摩洋格知
歸德府事行樞密院事癸酉詔罷遣有司所拘民間輸
稅車牛以運軍士衣糧者甲戌諭附其民盡徙其芻糧
入城官儲併運之丙子行樞密院知河南府事完顏哈
達以徵兵失應坐誅戶部郎中魏琦以沒王事官其子

已卯議禁京師靡穀近侍以寶券方行恐遲其用不果
吏部令史韓希祖陳言曾以戰功致身者盡拘京師備
用從之十一月庚辰朔增定守禦官及軍人遷賞格辛
巳詔止附京農民自撤其廬舍壬午河南行省胥鼎入
援京師用其言以知平陽府王質擢元帥左監軍同知
完顏僧嘉努擢右監軍代鎮河東拜鼎為尚書左丞兼
樞密副使知歸德府完顏伯嘉簽樞密院事以完顏哈
達伏誅詔中外乙酉元帥右都監完顏薩布來獻其提

控實嘉喀齊喀揚沃哩等大敗夏人于定西之捷命行
省視其功賞之大元兵至沔池右副元帥富察阿里巴
斯軍潰而逃失其所佩虎符丙戌前臨潢府推官權元
帥右監軍完顏哈達率官軍老幼自北歸國升鎮南軍
節度使進官三階詔出公帑綿絹付有司償所括民服
以衣軍者是夕月暈木星在奎月在壁己丑定毀防
城器具法辛卯詔立功五品以上官賜饌御前六品以
下官賜饌近侍局癸巳上諭皇太子京城提控官有以

文資充者彼豈知兵其速易之甲午放免諸職官僉從
及諸司局射糧兵卒嘗選充軍者戊戌勅諸州縣簽籍
軍民以備土寇華州元帥府復潼關庚子罷在京防城
民軍遣御史陳規等充河南宣差安撫捕盜官河南路
統軍使赫舍哩素赫以發兵後期坐誅甲辰以尚書工
部侍郎和尚等充賀宋正旦使丙午河南行樞密院蘇
爾坦言其族人道格願隸行伍以自効上嘉其忠許之
內族承立進所獲馬駝上曰此軍士所得即以予之可

也朕安用哉因徧諭諸道將帥後勿復如是十二月辛亥平章政事珠格高琪加崇進尚書右丞相參知政事李革罷癸亥大元兵攻平陽丙寅皇太子議伐西夏大元兵徇大名府壬申大元兵進自代州神仙橫城及平定承天鎮諸隘攻太原府宣撫使烏庫哩禮遣人間道齎書至京師告急詔發潞州元師府平陽河中絳孟宣撫司兵援之乙亥高琪請修南京裏城上曰民力已困此役一興病滋甚矣城雖完固朕亦何能獨安此乎

金史卷十四